



KOMUNIDADE VOKASIONÁL SIRA

Sim ida, ne'ebé hafoun beibeik

Maromak nia Liafuan sai bee-matan Moris nian ba sira hotu ne'ebé husik ninia mistériu enkanta sira. Fulan ida ne'e ita hahú enkontru ho testu furak ida husi comunidade João nian. Husi ita-nia kontestu ohin loron nian, ne'ebé marka ho terus no moras “pandemia oinoin nian”, maibé mós nakloke ba esperansa no ba empenú, ita hakarak hari'i diálogu libertadór ida ho Maromak nia Liafuan ida ne'e.

Iha *kairós* (tempu salvasaun nian) ida ne'e, ita, hamutuk ho feto sira seluk, hakarak tama iha istória, konxiente katak ita nia knaar mak troka-laek, *atu kria tempu ida nakonu ho moris ne'ebé umana liu no iha dignidade boot liu ba ema hotu*. Ami hakarak haka'as an, nu'udar konsagrada salesiana, ba motivu ida ne'e, tanba ami segura no konvensida katak *Liafuan no Karizma* bele kria fila fali prosesu ida ne'e konversaun no jeneratividade nian iha ita-nia Instituto, iha Kreda no iha Umanidade.

Ita hotu simu konvite atu partisipa ba festa Kana nian. Ita mós ba hamutuk ho grupu ida ne'e, hanesan Jezús ho ninia Inan no eskolante sira, atu partisipa no fó continuidade ba festa ida ne'e, iha ita-nia Instituto nia momentu ohin nian no iha dalan preparasaun ba tinan 150 husi Instituto nia fundasaun.

Ita sei hakbesik testu Kana nian atu *halo leitura bíblika dinamika no ezistensial* kona-ba “tua ne'ebé falta”, kona-ba “bee naresin ne'ebé hakonu kusi”, kona-ba importánsia “diálogu kontinuu entre Jezús no Feto”, kona-ba “Maria nia intervensaun ne'ebé antispá Jezús nia oras”, kona-ba “Jezús nia asaun” ba sira ne'ebé celebra kasamentu, ho atan sira nia servisu fiel.



Ami konvida atu halo leitura ho *hateke fetu nian*, ho atensaun espesifika ba Maria nia prezensa iha testu no oinsá nia interpela ita iha ohin loron ita-nia Institutu nian, ne'ebé “ninia tomak”. Ninia intervensaun mak dezisivu, uluk no agora mós. Ninia intervensaun mai *husi hateken ida ne'ebé marka diferénsia no troka realidade*. Nia halo buat ruma, hodi tuir ninia oan Jezús, nia book atan sira, nia akompaña uma na'in tenda nia hakfodak no nia haksolok ho tua di'ak ne'ebé garante ba festa nia susesu. Iha ninia parte, Jezús bele oferese tua di'ak liu, ida ne'ebé rai ba festa nia konklusaun, tan atan sira nia atitude ne'ebé halo tuir no prontu atu rona no halo, tuir buat ne'ebé Nia dehan ba sira. Jezús, ho Maria nia tulun, hahú, durante festa Kana nian, movimentu dinamiku ida husi *domin agape nian* ne'ebé serbí, hakru'uk no iha ninia abut iha Maromak no, tan ne'e, mak gratuitu, laran luak, ikus no haksolok.

Hena ida ne'ebé realiza ho kabas-lahan tolu

Atu komprende di'ak liután João nia Evanjellu nia dinamika, ita bele hanoin ba hena ida, ne'ebé halo ho kabas-lahan tolu ne'ebé oin-seluk liu, maibé mós besik malu, tan ne'e, dala ruma susar atu komprende bainhira João haksoit husi kabas-lahan ida ba ida fali. Kabas-lahan tolu ne'e mak:

1. ***Jezús nia akontesimentu sira moris nian*** ne'ebé mosu durante tinan 30. Sasin sira hanoin hetan, sira ne'ebé moris hamutuk ho Jezús no rai buat ne'ebé Nia halo no liafuan sira ne'ebé hanorin. Ne'e mak *Jezús istoriku*, ne'ebé Eskolante ne'ebé Nia hadomi rai iha ninia fuan no mós ema barak ne'e halo parte comunidade hanoin hetan.
2. ***Komunidade sira nia akontesimentu sira moris nian***. Husi sira-nia fiar ba Jeús no hodi fiar Ninia prezensa iha sira leet, comunidade sira leno sira-nia dalan

ho Jezús nia liafuan no jestu sira. Buat ne'e influénsia oinsá sira haktuir akontesimentu sira. Ez: comunidade sira nia konfliktu ho fariseu sira iha remata sekulu I marka oinsá ko'alia kona-ba Jezús nia konfliktu ho sira.

3. ***Komentáriu ne'ebé realiza iha redasaun finál.***

Iha pasajen ruma susar atu komprende bainhira Jezús ko'alia no bainhira redatór hato'o observasaun ruma (Gv.2,22; 3,16-21; 7,39; 12,37-43; 20,30-31).



**KOMUNIDADE HO DIXIPULA SIRA
NE'EBÉ JEZÚS HADOMI
NO NE'EBÉ HADOMI IHA NINIA NARAN**

1. Hanesan Maria, “jeneradora sira” moris foun nian

Ita hahú ita-nia reflesaun hodi la haluha Evanjellu João nia visaun.

- ***Tempu ne'ebé jenera moris foun. “Liu tiha loron tolu” (2,1)***

Pasajen ida ne'e hahú ho informasaun temporal ida ne'ebé iha signifíkadu riku liu. João haktuir ho simples semana ida: “*Liu tiha*



loron tolu, ema halo festa kaben nian iha Kana Galileia”, loron tolu kona-ba saida nian?

Husi liafuan dahuluk Evanjellu nian, João sura loron ne’ebé liu: “loron tuir mai...”; loron 1º: Jo 1,19; loron 2º: Jo 1,29; loron 3º: Jo 1,35; loron 4º: Jo 1,43.

“Liu tiha loron tolu” katak loron 7º: evanjelista João tau kasamentu ida ne’e iha loron Sabadu. Nune’e bele hanoin ba semana ida tomak, hanesan istória dahuluk Kriasaun nian (Jen 1,1-4). João haktuir semana ida ho Jezús nia atividade sira, ne’ebé remata ho “Sabbat”, loron dahitu. Ita hatene katak Kriasaun remata ho Maromak nia deskansu, iha gratuidade. Tuir tradisaun hebreu sira nian, Mesias sei mosu loron Sabadu nian. Iha loron neen, Jezús bolu eskolante sira no **kria comunidade, umanidade foun ida**. Loron dahitu Jezús *la deskansa, maibé fó sinál dahuluk* ho Kasamentu Kana nian, sinál **Kriasaun foun ida nian**.

Hodi hanoin ba Livru Jénezis nian, ita komprende katak Maria mak Feto ne’ebé gia Adão Foun atu halo ninia hahalok gloriozu dahuluk. Se Eva lori Adão ba sala, *Maria, nu’udar Eva Foun, mak Kriasaun Foun nia Inan*.

“Loron dahuluk” iha mós signifikadu atu **antisipa Resureisaun**, tanba fó hanoin ba mistériu paskál. Nune’e ita tama iha istória ida ne’ebé antisipa loron Paskua. Husi kapitulu 2 to’o 19, Jezús hatudu sinál 6 tan, hotu-hotu iha loron Sabadu (Jo 5,16; 9,14-16), hanesan mosu *Sabadu naruk ida*. Bainhira Maria Magdala ba rate, João hakerek: “loron uluk semana nian” (Jo 20,1). *Ida ne’e mak loron dahuluk Kriasaun Foun nian!* Liuhusi atividade sira ne’ebé Jezús hala’o husi kasamentu Kana nian no nia mate iha kruz, Aman Maromak termina buat ne’ebé falta iha kriasaun tuan, atu *Kriasaun Foun bele mosu ho Jezús nia Moris Hi’as*.



- ✓ Simbologija “tempu” nian mak signifikativa nu’udar Komunitade João nia xave atu interpreta no nia interpela ita-nia realidade komunitaria iha prosesu pastorál sira ne’ebé ita anima. Signifikadu sa de’it ita fó ba tempu iha ita-nia prosesu komunitariu?

Amo Papa Francisco fo hanoin hateken foun ba “tempu”, ho prinsipiu ne’ebé nia propoin ba projetu komunitariu sira: **“Tempu mak aas liu espasu”**. *Fó prioridade ba tempu dehan katak ita haka’as an atu hala’o prosesu sira duke buka fatin*. Tenke fó prioridade ba *asaun sira ne’ebé hahú dinamizmu foun sira no envolve* ema no grupu sira ne’ebé sei dezenvolve sira to’o fó fuan iha eventu istóriu importante sira. La iha ansi, maibé konvinksaun klara no forte.

- ✓ Oinsá ita hatama, iha ita-nia proposta pastorál sira, *tempu foun sira* ne’ebé foin-sa’e sira lori no husu? *Moris foun sa de’it ita hakarak jenera* iha fatin iha ne’ebé ita hela ba?
- ✓ Ho modu sa de’it ita-nia Komunitade Edukante sira haka’as an atu *hala’o prosesu sira*? Ka komunitade sira buka de’it atu iha rezultadu kedas, hodi la promove ema sira nia realizasaun?

2. Hanesan Maria, feto eukaristika sira

- ***Ita-nia konsagrasaun hafoun Aliansa.***
“Ema halo festa kaben nian” (2,1)

Testu ko’alia kona-ba *festa kasamentu nian*, maibé ita la hatene ema ne’ebé kaben ne’e se, ita hatene katak sira besik Maria, Jezús no eskolante sira tanba sira simu konvite. Kasamentu iha Sagrada



Eskritura mak simbolu unidade no ksolok nian, se falta tua ba festa buat hotu bele sai aat liu.

Kasamentu iha A.T. mak **simbolu Aliansa Domin nian ne'ebé Maromak estabesele ho ninia povu**. Profeta balun fó hanoin ba simbolu ida ne'e (Hos 2,16-25; Is 49,14-26; 54; 62; Jer 31,3; 31-34; Ez.16).

Iha N.T. Jezús asumi figura **Noivu nian** no comunidade sai **Ninia Noiva ne'ebé hadomi**. Durante selebrasaun Kana nian, ema fui tua husi banquete mesianiku, tua naresin ho kualidade di'ak liu (Is.25, 6-9; Jo 2,1-11). Iha Apokalipse, Kreda hanesan **Noiva** ne'ebé hatais ona ho hena lahan furak (Ap 19,7-8) hodi hein no deseja ninia **Noivu** nia hiit an mai (Ap 22,17). Biblia reprezenta Kreda, iha tempu ikus nian, hanesan Jerusalem ne'ebé tun husi lalehan, nia mak Noiva ne'ebé fatuk murak oinoin hafurak nia atu selebra kasamentu ba nafatin.

Hanesan ita hatene, kasamentu ezije katak sira na'in rua, ne'ebé hili malu nu'udar kaben na'in, halo aliansa ida. Interessante haree oinsá aliansa umana ida ne'e dezenvelope tuir tradisaun sira ba selebrasaun iha tempu bibliku sira, atu imajina ninia karakter simboliku kona-ba relasaun Maromak-povu no iha istória Kana. Selebrasaun nia tapa sira tuir malu nune'e:

- a. Noivu buka ninia noiva atu lori ba ninia uma, tanba festa kasamentu nian hala'o iha ne'ebá. Molok husik ninia uma, noiva simu bengan husi aman-inan sira no parenti sira (Jén 24,60). Noiva husik nia aman nia uma ho fatuk murak, mina-morin no koroa iha ihaulun (Ez 16,11-14).
- b. Noivu sai ho ninia noiva no, tuir dalan, halo prozisaun boot to'o ninia uma. Durante prozisaun presiza lori ahi-oan ka "obor" atu haroman dalan nakukun sira. Tuir dalan, ema barak tama hamutuk ho konvidadu sira. Noiva la kesi fuuk no taka oin ho hena laan ida. Parenti balun oferese fore-rai sona ba labarik sira iha dalan. Ema hotu



hatudu ksolok tuir dalan to'o destinasaun. Iha prozisaun ema toka tambor, no instrumentu musikál oinoin, no sira dansa.

- c. Momentu importante liu bainhira noiva to'o noivu nia uma no tama iha ninia uma foun (Sal 45,14-16).
- d. Uma na'in tenda mak preside festa kasamentu (kf Jo 2,8-9). Ninia knaar mak tau matan ba preparasaun no, durante festa, la'o iha konvidadu sira leet atu haree se sira presiza buat ruma. Durante tempu han, ema haksolok no bainbain konvidadu sira gava noiva. La iha serimonia relijioza ida ne'ebé akompaña festa ida ne'e; iha ninia fatin iha bensen husi parenti no belun sira (kf Rut 4,11). Festa kontinua ba semana ida, hafoin belun sira akompaña noivu to'o ninia kuartu, iha ne'ebé ninia ferik-oan hein ona.

Hodi konsidera Kasamentu nu'udar Aliansa Domin nian entre Maromak no Ninia povu, ita komprende tansa ko'alia kona-ba ***Maria Feto no Eukaristia***. Maski iha João nia Evanjellu ita la hetan Han kalan ikus eukaristika, maibé iha elementu barak, iha testu Kana nian, ne'ebé konvida ita atu asumi atitude *Jezús nia inan nian, ne'ebé sai Eukaristia* nu'udar prezente, aihan, knotak fekundu, servisu no oblasaun.

Ne'e mak Aliansa Domin nian ne'ebé ita renova tinan-tinan ka ita profesa ba nafatin ho ita-nia Votu Perpetuu sira no ita renova *iha Eukaristia ida-idak* nu'udar ita-nia moris tomak nia buat karan, hamutuk Jezús nia sakrifisiu iha altár, ba humanidade.

- ✓ Ohin loraun, oinsá ita-nia esperiénsia eukaristika? Oinsá ita renova ita-nia konsagrasaun hamutuk ho Jezús nia sakrifisiu, ba salvasaun foin-sa'e sira nian no ema ne'ebé terus iha mundu ohin loraun?

- ***Hodi inaugura tempu foun ida.***



“Iha Kana Galileia nian” (2,1)

Galileia mak fatin iha ne'ebé Jezús moris no iha relasaun ho ninia família (Jo 7,5.41). ida ne'e mak rejiaun iha ne'ebé Jezús hala'o atividade publika boot no mós fatin konfliktu sira nian. Jezús husik João Baptista nia grupu no ho eskolante sira ba Galileia; iha Kana akontese sinál kona-ba bee ne'ebé nakfilak ba tua.

Galileia mak fatin ne'ebé la iha tradisaun, la iha profeta sira, la iha istória... maibé ida ne'e mak fatin ne'ebé Jezús hili atu hala'o ninia misaun, atu haklaken tempu foun, evanjelizasaun. Tanba iha tempu ne'ebá, hanesan tempu hotu, haklaken evanjeliku presiza inaugurasau ida, la'ós repetisaun, maibé novidade evanjelika, la'ós kontente ho buat ne'ebé halo ona.

- ✓ Ita insiste ho ita-nia liafuan sira katak tenke troka no hahú fali, maibé ita ladún suporta ho hahalok. Hodi la book an, ita konforma no adapta ita-nia moris; ita prefere liafuan sira ne'ebé ladún inkomoda, espresaun sira ne'ebé la interpela ita. Maibé, Jezús nia destinú, lori ita atu hili ba fatin iha periferia, hodi haklaken Liafoun Di'ak. Oinsá ita fó sasin kona-ba buat ne'e?

Sr. Marta Riccioli



Istituto Figlie di Maria Ausiliatrice

Salesiane di Don Bosco

Ispettorato Santa M. D. Mazzarello - TIN
Dili Comoro - Timor Est

RETIRU FULAN JANEIRU

